



Komunikadu Imprensa
20 Dezembru 2022
Parlamentu Nasionál

JSMP Rekomenda ba Provedór Eleitu atu tau Priopridade ba Promove Direitu Umanu no Governasaun Di'ak iha Timor-Leste

Iha 12 Dezembru 2022, Parlamentu Nasionál, liuhusi reuniaun Plenáriu, halo votasaun sekretu hodi hili Sr. Virgilio da Silva Guterres ba Provedór Direitu Umanu no Justisa (PDHJ) foun ba períodu tinan 2022-2026 ho votu afavór 34 kontra 29. Enkuantu, kandidatu sira ba provedór mak Sra. Carmen Joela Pereira, Sr. Ivo Colimau Lay da Costa, Sr. Horacio de Almeida, Sr. Nelson Philomeno Rego de Jesus no Sr. Virgilio da Silva Guterres.

Iha eleisaun primeira volta, kandidatu na'in 2 husi na'in 5 mak hetan votu barak liu no kontinua ba segunda volta. Kandidatu na'in rua ne'e mak Sr. Ivo Colimau Lay da Costa ho votu 29 no Sr. Virgilio da Silva Guterres ho votu 27. Entretantu kandidatu sira seluk hanesan Sr. Horacio de Almeida hetan votu 4, Sra. Carmen Joela Pereira hetan votu 1 no Sr. Nelson Philomeno Rego de Jesus votu 0 no votu 2 mak nulu.

“JSMP kongratula Provedór eleitu ne'ebé hetan konfiansa husi Parlamentu Nasionál atu derije PDHJ ho nune'e JSMP husu atu provedór tau priopridade ba promove direitu umanu no Governasaun Di'ak iha Timor-Leste tuir kompeténsia sira ne'ebé kontituisaun fó hodi salvaguarda interese públiku no defende ita nia Lei Inan no ita nia Estado Direitu Demokrátiku,” dehan Diretora Ezekutiva JSMP, Ana Paula Marçal.

JSMP mós rekomenda ba Provedór eleitu atu kumpri artigu 150 no 151 husi KRDTL hodi efetivamente husu fiskalizaun abstrata ho konstitusionalidade ba Supremu Tribunál Justisa hodi halo verifikasaun konstitusionalidade ba omisaun husi medida sira lejislativa ne'ebé durante ne'e sai kestaun públiku tanba la refléta interese povu nian.

Alende ne'e, Provedór eleitu tenke fó prioridade ba iha objetivu estratéjiku ne'ebé mak fixadu ba períodu tinan lima oin mai mak hanesan; asegura kapasidade no independénsia PDHJ hodi garante PDHJ bele implementa mandatu ho di'ak, asegura katak autoridade pública no comunidade sira iha koñesimentu di'ak kona-ba direitus umanus no Governasaun Di'ak, garante katak autoridade pública sira halo prevensaun no korresaun ba violasaun ba prinsípiu direitus umanus no governasaun di'ak no ikus mak ema vulneravel sira iha protesaus hasoru violasaun direitus umanus no bele hetan asesu ba atendimentu públiku ne'ebé di'ak.

JSMP hein katak, Provedór eleitu sei nakloke-an atu rona no konsidera hanoin husi sociedade sivil relasiona ho kestaun direitu umanu sira ne'ebé durante ne'e sai preokupasaun komún nian.

Tuir informasaun husi Parlamentu Nasionál informa katak agenda Parlamentu Nasionál nian ba tomada de pose ba provedór eleitu hala'o iha 20 fulan Dezembru 2022 iha edifísiu Parlamentu Nasionál.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>
www.jsmp.tl

Rua Beco Lakateu, Aldeia Manufuik,
SukuColmera, Administrativu Vera Cruz
Dili Timor Leste
PoBox: 275
Telefone: 3323883 | 77040735

www.jsmp.tl
ana@jsmp.tl

Facebook: www.facebook.com/timorleste.jsmp

Twitter: @JSMPtl